

詩

源

辯

體

詩源辯體卷之二 楚

改定本

江陰許學夷伯清 著

嚴滄浪云風雅頌既亡一變而為離騷屈宋楚辭總名再變而為

西漢五言愚按三百篇正流而為漢魏諸詩詳見下卷別出

而乃為騷耳胡元瑞云昔人言詩文之有騷賦猶草木

之有竹禽獸之有魚難以分屬然騷實歌行之祖賦則

比興一端要皆屬詩近之已上七句皆元瑞語以

朱子云詩有六義楚人之詞亦以是而求之其寓情草木

託意男女以極遊觀之適者變風之流也其敘事陳情

感今懷古不忘君臣之義者變雅之類也其語事神歌

舞之盛則幾乎頌矣賦則如騷經首草之云也比則香草惡物之類也興則託物興詞初不取義如九歌沅芷澧蘭以興思公子而未敢言之屬也然詩之興多而比賦少騷則興少而比賦多要必辨此而後詞義可尋上

朱子語

祝君澤云騷人之賦與詩人之賦雖異然猶有古

詩之義辭雖麗而義可則詩人所賦因以吟詠情性也騷人所賦亦以其發乎情也其情不自知而形於辭其辭不自知而合於理情形於辭故麗而可觀辭合於理故則而可法愚按詩騷之變斯並得之

祝君澤云屈宋之辭家傳人誦尚矣刪後遺音莫此爲古

者以兼六義焉爾。賦者

賦卽騷也

誠能雋永於斯則知其辭

所以有無窮之意味者。誠以舒憂泄思。粲然出於情故

其忠君愛國隱然出於理。自情而辭自辭而理。真得詩

人發乎情。止乎禮義之妙。豈徒以辭而已哉。如但知屈

求之辭爲古。而莫知其所以古。及其極力摹倣。則又徒

爲艱深之言。以文其淺近之說。摘奇難之字。以工其鄙

陋之辭。汲汲焉以辭爲古。而意味殊索然矣。夫何古之

有。又云。賦之爲古。亦觀六義所發何如耳。若夫霧縠組

麗。雕蟲篆刻。以從事於侈靡之辭。而不本於情。其體固

已非古。况乎專尚奇難之字。以爲古。吾恐其益趨於辭

之末而益遠於辭之本也。味君澤之說則近代之爲騷者可知矣。

胡元瑞云四詩典則雅淳

國風二雅及頌

自是三代風範宏麗之

端實自離騷發之。**劉勰**云離騷軒翥詩人之後奮飛辭

家之前故其陳堯舜之耿介稱禹湯之祗敬典誥之體

也。譏桀紂之猖狂傷羿澆之顛隕規諷之旨也。虬龍以

喻君子雲霓以譬讒邪比興之義也。每一顧而掩涕歎

君門之九重忠怨之辭也。觀茲四事同于風雅者也。至

於託雲龍說迂怪豐隆求宓妃。鴉鳥媒娥女詭異之辭

也。康回傾地夷羿弊日木夫九首土伯三目譎怪之談

也。依彭咸之遺則從子胥以自適。狷狹之志也。士女雜坐。亂而不分。指以爲樂。娛酒不廢。沉湎日夜。舉以爲歡。荒淫之意也。擿此四者。異乎經典者也。故論其典誥。則以彼語其夸誕。則如此固知楚辭者體慢於三代。而風雅於戰國。乃雅頌之博徒。而詞賦之英傑也。按淮南王宣帝楊雄王逸皆舉以方經。而班固獨深貶之。勰始折衷爲千古定論。蓋屈子本辭賦之宗。不必以聖經列之也。

屈原離騷。朱子謂其出於忠君愛國之誠心。而馳騁於變風變雅之末流。

卽劉勰言異乎經典者也

爲醇儒莊士所羞稱。此語

實不爲謬。焦弱侯極詆之。謂豈變風變雅。非孔子所刪定。而醇儒莊士。能舍忠君愛國。以爲道耶。至又不欲以怨憤傷原。而謂其指一歸於平淡。愚按屈原之忠。忠而過。乃千古定論。今但以其辭之工也。而謂其無偏無過。欲強躋之於大聖中和之域。後世其孰信之。此不足以揚原。適足以累已耳。

王元美云。騷辭所以總雜重複。與寄不一者。大抵忠臣怨夫。惻怛深至。不暇致詮。亦故亂其緒。使同聲者自尋。修辭者難摘耳。愚按騷辭雖總雜重複。與寄不一。細繹之。未嘗不聯絡有緒。元美所謂雜而不亂。復而不厭。是也。

學者苟能熟讀涵泳於窈冥恍惚之中得其脈絡識其
深永之妙則騷之真趣乃見後人學騷者於六義亦未
嘗缺而深永處實少此又君澤所未悉也

凡讀騷辭得其深永之妙一倡三歎而不能自己者上也
得其窈冥恍惚漫衍無窮可喜可愕者次也得其金石
宮商之聲琅琅出諸喉吻而有遺音者又次也否則但
如嚼蠟耳

屈原遠遊較離騷更爲聯絡而文采亦完文選不錄不可
曉司馬相如大人賦雖倣遠遊然好以奇難爲工後人
幾不能讀矣

屈原九歌本祀神之辭。中惟湘君湘夫人大司命少司命四章。或有寄意於君臣之間者。餘數章則直祀神耳。註家必欲謂屈子事事不忘君。故每每穿鑿強解。意以爲必如此。乃不妄作。遂使古人文字牽纏附合。愈讀愈晦。則註家之過也。知此則可以觀陶杜矣。

九歌國殤一篇。聲悍氣峻。鐸若金鐵。與諸作不同。正足爲毅魂鼓勇。

離騷宏麗。九歌秀美。然九歌可學。而離騷不易學也。國朝諸先輩競力爲騷。紛紛摹擬。一時屈子羣然在目矣。屈原九章不如九歌。九章涉江哀郢爲勝。文選錄涉江而

滄浪取哀郢。各有意。然九章較離騷。九歌制作多有不
類。卽涉江哀郢最工。而文又甚顯。疑未必皆屈子所爲。
至如惜往日云。不畢辭而赴淵兮。惜壅君之不識。悲回
風云。驟諫君而不聽兮。任重石之何益。是豈屈子口語。
耶。蓋必唐勒景差之徒。爲原而作。一時失其名。遂附入
屈原耳。註家強解可笑。

屈原卜居。思若湧泉。文如貫珠。妙不容言。漁父警絕稍遜。
而整齊有法。背變騷入賦之漸。故文選特錄之。張中山
云。卜居漁父意淺語庸。疑是僞作。其憤謬至此。

張中山說天問云。原見放屏居。咄咄無聊。雜憶往古。隨筆

詰問。若曰人不足問。故呼天而問之。且其命辭樸拙。斷非漢以後人所能道。但篇中雜沓參差。讀者費解。舊說謂見宗廟圖画而問。恐壁間未必画此種種。愚按中山說楚辭。每多謬戾。惟此庶爲獨得。

宋玉九辨。較屈原九歌。雖若流利。而氣似稍劣。惟卒章氣甚雄沛。然諸篇與屈子另爲一手。焦弱侯謂語類自傷。當出原作。非也。

宋玉九辨。舊分爲十一章。前五章從文選所定。無疑。後自霜露慘悽。至信未達乎從容。爲第六。自竊美申包胥之氣盛。至不得見乎陽春。爲第七。自靚杪秋之暹夜。至蹇

淹留而躊躇爲第八。自何汜濫之浮雲。至亦多端而膠加爲第九。自被荷裯之晏晏。至妬被離而鄣之爲第十。自願賜不肖之軀至末。爲第十一。朱子更定爲九章。以實九數。以霜露慘悽。合竊美申包胥爲一章。以何汜濫之浮雲。合被荷裯之晏晏。至下暗漠而無光爲一章。以堯舜皆有所舉任。合願賜不肖之軀爲一章。其論以何汜濫之浮雲。與後卒壅蔽此浮雲相應。宜爲一章。願賜不肖之軀以下。不屬前章。則前段無尾。後段無首。而不成文。愚謂朱子以此解論孟之書。則可。非所以說騷也。且以霜露慘悽。與竊美申包胥爲一章。尚或可從。至被

荷裯之晏晏與願賜不肖之軀而別離皆顯然起語安得插入胃腹耶。且屈原九歌實十一章故知九數外別自有附入者不必於九辨致疑也。今以霜露慘懷合竊美申包胥從朱餘復以被荷裯之晏晏至下暗漠而無光爲一章他悉如舊仍定爲十一章。

宋玉九辨多傷歲時搖落年命將衰放棄無成之意要各有所爲未必皆爲屈原也。漢人惟東方朔七諫劉向九歎爲屈原作他如賈誼惜誓嚴忌哀時命王褒九懷亦各有爲。王逸穿鑿悉以爲爲原而作。且如哀時命云子胥死而成義兮屈原沉於汨羅九懷云伊思兮往古亦

多兮遭殃。伍胥兮浮江。屈子兮沉湘。是豈爲原作耶。

宋玉招魂。乃屈原旣死。而宋玉招之。舊說皆以爲屈原放斥。玉慮其魂魄將散。故作招魂以招之。朱子又云。荆楚之俗。或以是施之生人。玉遂因其國俗以招之也。爲此說者。蓋因其篇首數語有未明耳。其曰。朕幼清以廉潔。今身服義而未沫。主此盛德兮。牽於俗而蕪穢。上無所考。此盛德兮。長離殃而愁苦。此正屈原旣死。宋玉託原詞以訴上帝。故帝遣巫陽以招之也。言長離殃而愁苦。則平生轢軻。與懷沙赴江。俱在其中矣。二千年醉夢未醒。可發一笑。

宋玉招魂語語警絕唐勒大招舊以爲景差作胡元雖攸瑞考定以爲唐勒

其體製而文采不及文選取招魂而遺大招是也朱子

謂大招於天道誦伸動靜若粗識其端倪於國體時政

又頗知所先後遂以爲勝招魂此儒者之見非詞家定

論也

屈宋楚辭爲千古詞賦之宗不特意味深永而佳句可摘

然有秀雅之句有瑰瑋之句屈原如余旣滋蘭之九畹

兮又樹蕙之百畹朝飲木蘭之墜露兮夕餐秋菊之

落英製芰荷以爲衣兮鑲芙蓉以爲裳瑤席兮玉

璫盍將把兮瓊芳蕙肴蒸兮蘭藉奠桂酒兮椒漿望

夫君兮未來。吹參差兮誰思。捐余玦兮江中。遺余佩
兮澧浦。采芳洲兮杜若。將以遺兮下女。時不可兮再得。
聊逍遙兮容與。嫋嫋兮秋風。洞庭波兮木葉下。沅
有芷兮澧有蘭。思公子兮未敢言。蘼蘭兮青青。綠葉
兮紫莖。滿堂兮美人。忽獨與余兮目成。入不言兮出不
辭。乘回風兮載雲旗。悲莫悲兮生別離。樂莫樂兮新相
知。乘赤豹兮從文狸。辛夷車兮結桂旗。采三秀兮
於山間。石磊磊兮葛蔓蔓。怨公子兮悵忘歸。君思我兮
不得閒。山峻高以蔽日兮。下幽晦以多雨。霰雪紛其
無垠兮。雲霏霏而承宇。宋玉如沈寥兮。天高而氣清。

宋蓼兮收潦而水清

同

燕翩翩其辭歸兮蟬宋漠而

無聲鴈離離而南遊兮鵲離啁哳而悲鳴皆秀雅之

句也屈原如朝發軔於蒼梧兮夕余至乎縣圃欲少

留此靈瑣兮日忽忽其將暮吾令羲和弭節兮望崦嵫

而勿迫路曼曼其修遠兮吾將上下而求索飲余馬於

咸池兮總余轡乎扶桑折若木以拂日兮聊逍遙以相

羊駕八龍之蜿蜒兮載雲旗之委蛇據青冥而攬

虹兮遂儵忽而捫天擘彗星以爲旂兮舉斗柄以爲

麾使湘靈鼓瑟兮令海若舞馮夷玄螭蟲象並出進

兮形蜺虬而透蛇經營四荒兮周流六漠上至列缺

兮降望大壑。下崢嶸而無地兮。上寥廓而無天。視儵忽
而無見兮。聽悄悄而無聞。超無爲以至清兮。與泰初而
爲隣。廣開兮天門。紛吾乘兮玄雲。令飄風兮先驅。使
凍雨兮灑塵。與女遊兮九河。衝風起兮水橫波。魚
鱗屋兮龍堂。紫貝闕兮朱宮。靈何爲兮水中。子交手
兮東行。送美人兮南浦。波滔滔兮來迎。魚鱗鱗兮媵予。
杳冥冥兮晝晦。東風飄兮神靈雨。雷填填兮雨
冥冥。猿啾啾兮狔夜鳴。風颯颯兮木蕭蕭。思公子兮徒
離憂。宋玉如願。賜不肖之軀而別離兮。放遊志乎雲
中。察精氣之搏搏兮。騫諸神之湛湛。驂白霓之習習兮。

歷羣靈之豐豐。左朱雀之茷茷。今右蒼龍之躍躍。屬雷師之闐闐。今道飛廉之衙衙。前輕輶之鏘鏘。今後輔察之從從。載雲旗之委蛇。今扈屯騎之容容。皆瑰瑋之句也。後人爲楚辭者。但能竊其糟粕。餽成篇。至其佳句了不可得矣。

朱子楚辭註。較王逸簡淨明白。讀之頗爲連屬。然亦互有得失。至離騷以四句爲一章。不免穿鑿耳。張中山刪註楚辭。於朱註一語不錄。已甚失之。又謂離騷原不用韻。強叶者非。則似於騷辭初未窺一斑也。

嚴滄浪云。楚辭惟屈宋諸篇當讀。外惟賈誼懷長沙。

不見楚辭

淮南王招隱操嚴夫子哀時命此外亦不必也愚按諸篇而外尚有賈誼惜誓可讀其他摹倣盜襲無一警語至如方朔初放王逸逢尤益又卑下矣

胡元瑞云騷與賦句語無甚相遠體裁則大不同騷複雜無倫賦整蔚有序騷以含蓄深婉爲尚賦以誇張宏鉅爲工又云騷盛於楚衰於漢而亡於魏賦盛於漢衰於魏而亡於唐求騷於漢之世其招隱乎求賦於魏之後其二都乎愚按屈原卜居漁父宋玉招魂唐勒大招皆賦體也相如大人賦宜春宮賦班固幽通賦張衡思立賦皆騷體也學者不可不辨

以下二則論騷賦之不同

詩源辨體

卷之二 論

定本

胡元瑞云。世率稱楚騷。漢賦。昭明文選。分騷賦爲二。歷代因之。名義旣殊。體裁亦別。然屈原諸作。當時皆謂之賦。漢藝文志所列詩賦一種。而無所謂騷者。首冠屈原賦二十五篇。自荀卿宋玉。指事詠物。別爲賦體。楊馬而下。大演波流。屈氏諸作。遂俱係離騷爲名。實皆賦一體也。此論前人所未發明。

予少不曉事。謂古人於詩文。自無不能。後讀毛詩序。與兩漢文筆大異。讀荀卿詩賦。與三百篇。屈宋之辭大異。乃知後世之儒。於詩文。自有不能。非止有善有不善也。王元美云。荀卿成相諸篇。便是千古惡道得之。

此一則附論荀卿詩

賦

祝君澤云子虛上林兩都二京三都首尾是文中間乃賦
世傳既久變而又變其中間之賦以鋪張爲靡而專於
辭者則流爲齊梁唐初之俳體其首尾之文以議論爲
使而專於理者則流爲唐末及宋之文體性情益遠六
義漸滅賦體遂失又云俳體始於兩漢漢漸入於俳也律體始
於齊梁俳者律之根律者俳之蔓陳后山云俳體卑矣
而加以律律體弱矣而加以四六此唐以來進士賦體
之所由始也愚按古今賦體之變此爲盡之此一則論賦體之變

詩源辯體卷之三

漢魏總論 漢

改定本

江陰許學夷伯清 著

三百篇始流而爲漢魏國風流而爲漢十九首蘇李魏三

祖七子之五言

王欽佩謂漢魏變於雅頌唐體沿於國風此但以古律聲氣求之然魏人五言

如子建贈白馬王及仲宣公譙從軍等作實出於雅則又不可不知雅流而爲漢韋孟韋

玄成魏曹植王粲之四言頌流而爲漢安世房中武帝

郊祀魏王粲太廟頌俞兒舞之雜言然五言於風爲近

而四言於雅漸遠雜言於頌則愈失之故鍾嶸詩品止

於五言而昭明文選亦不及乎雜言也胡元瑞云國風

雅頌並列聖經第風人所賦多本室家行旅悲歡聚散

感歎憶贈之詞。故其遺響。後世獨傳。雅頌閎奧淳深。莊嚴典則。施諸明堂清廟。用既不倫。作自聖佐賢臣。體又迴別。三代而下。寥寥寡和。宜矣。魏詩較漢有同有異。以下總論論漢魏之同者。至下卷始分別矣。

漢魏五言源於國風。而本乎情。故多託物興寄。體製玲瓏。爲千古五言之宗。說見國風論第三則。詳而論之。魏人體製漸失。晉宋齊梁。日趨日亡矣。

漢魏五言本乎情興。故其體委婉而語悠圓。有天成之妙。五言古惟是爲正。詳而論之。魏人漸見作用。而漸入於變矣。

漢魏五言委婉悠圓於國風爲近。此變之善者。使漢魏復爲四言。則不免於襲。不能擅美千古矣。胡元瑞云。四言盛於周。漢一變而爲五言。體雖不同。詞實並駕。乃變之善者也。語誠有見。然不免或過。說見十九首論中

漢魏五言雖本乎情之真。未必本乎情之正。說見十九首論中故性情不復論耳。或欲以國風之性情論漢魏之詩。猶欲以六經之理論秦漢之文。弗多得矣。

漢魏五言委婉悠圓。雖本乎情。然亦非才高者不能。但有才而不露耳。以十九首蘇李曹植王劉與趙壹徐幹陳琳阮瑀相比。則知非才高者不能也。

漢魏五言。委婉悠圓。其氣格自在。不必言耳。或欲於漢魏。

專取氣格。故必先蒼莽古質。而後委婉悠圓。

如所謂曹公勝於子

建之類詳見曹公詩論中

是慕好古之名。而不得其實者也。昭明文

選庶幾得之。

趙凡夫云。古詩在篇不在句。此語人未易曉。漢魏五言格

不同而語同。語不同而意同者。實多。予日夕諷詠。初不

覺也。後見人一一檢出。方盡知之。然不知九方相馬。天

機竟在何處。

古詩歌不當以小疵棄之。漢魏五言中亦有意思重複。詞

語質野。字句難訓。雖非可法。不害爲古。又如青青河畔

草。一連六句用疊字。正見天成之妙。

漢魏五言渾然天成。初未可以句摘。晉宋而下。工拙方可

以句摘矣。嚴滄浪云。漢魏古詩氣象渾淪。一本作混淪。非。難以

句摘。晉以還。方有佳句。是也。王孝伯稱古詩所遇無故

物。焉得不速老。爲佳句。蓋論理意耳。以下七則論漢魏詩與後代不同。

胡元瑞云。滄浪謂古詩氣象渾淪。難以句摘。此但可言漢

若高臺多悲風。明月照高樓。思君如流水。皆建安語也。

子桓。子建。如丹霞夾明月。華星出雲間。秋蘭被長阪。朱

華冒綠池。句法字法。稍稍透露。予按十九首。如思君令

人老。磊磊澗中石。同心而離居。秋草萋以綠。與子建高

臺多悲風等。本乎天成而無作用之跡。作者初不自知耳。如子桓丹霞夾明月等語。乃是構結使然。必若陸士衡輩有意雕刻。始可稱佳句也。

漢魏五言爲情而造文。故其體委婉而情深。顏謝五言爲文而造意。故其語雕刻而意冗。呂氏童蒙訓云。讀古詩十九首。及曹子建諸詩。如明月照高樓。流光正徘徊之類。皆思深遠而有餘意。言有盡而意無窮。學者當以此等詩常自涵養。自然下筆高妙。呂氏之所謂意。卽予之所謂情也。

漢魏五言深於興寄。故其體簡而委婉。唐人五言古善於

敷陳。故其體長而充暢。

漢魏五言。聲響色澤。無跡可求。至唐人五言古。則氣象崢嶸。聲色盡露矣。

或問漢魏詩。與李杜孰優劣。曰。漢魏五言。深於興寄。蓋風人之亞也。若李杜五言古。以所向如意爲能。乃詞人才子之詩。非漢魏比也。讀漢魏詩。一倡而三歎。有遺音矣。漢魏古詩。盛唐律詩。其妙處皆無跡可求。但漢魏無跡。本乎天成。而盛唐無跡。乃造詣而入也。或以漢魏無跡。亦造詣而入者。豈漢魏亦如唐人日鍛月鍊。千百成帙。而有階級可升耶。秦漢與唐宋人文章亦然。

漢魏人詩。自然而然。不假悟入。後之學者。去妄返真。正須

以悟入耳。嚴滄浪云。漢魏尚矣。不假悟也。又云。學者須

從最上乘。具正法眼。悟第一義。漢魏盛唐之詩。則第一

義也。

已上七句俱滄浪語。以下九則論學漢魏之詩。以

漢魏人詩。自然而然。不假學習。後之學者。情興不足。風氣

亦漓。苟非專習凝領。不能有得耳。胡元瑞云。兩漢詩。未

嘗鍛鍊求合。而神聖工巧。備出天造。今欲爲其體。非苦

思力索所辦。當盡取其詩。玩習凝會。風氣性情。纖屑具

領。若楚大夫子。身處莊獄。庶幾齊語。

已上十二句俱元瑞語。元瑞於漢魏

見其異而不見其同。故言兩漢而不及魏。

或問予元美有云。西京建安其體不宜多作。多不足以盡變。而嫌於襲。然則漢魏詩不當學耶。曰。漢魏詩非不當學。但不可倉卒爲之。多作則倉卒而嫌於襲矣。元美不云乎。西京建安似非琢磨可到。要在專習凝領之久。神與境會。忽然而來。渾然而就。無岐級可尋。無色聲可指。是也。故專習凝領而神與境會。乃足以盡變。倉卒琢磨而神與境離。則嫌於襲耳。

漢魏人詩本乎情興。學者專習凝領而神與境會。卽情興之所至。否則不失之襲。又未免苦思以意見爲詩耳。如阮籍詠懷之作。亦漸以意見爲詩矣。予學漢魏二十年。

始悟入焉。

何元朗云。古詩有託諷者。其詞曲而婉。然終始只一事。而首尾照應。血脉連屬。今人但摹倣古人詞句。餽飭成篇。血脉不相接續。復不辨有首尾。讀之終篇。不知其安身立命。在於何處。愚按。古今學漢魏者。惟于鱗爲近。然代從軍。公讌。不免於襲。送元美答俞仲蔚。又不免以意見爲詩。其他諸人。則多如元朗所云爾。乃知漢魏之詩。誠不易學也。

學漢魏詩。惟語不足以盡變。其興象不同。體裁亦異。固天機妙運。無方耳。譬如學古人畫。苟一筆不類。便非其人。

若必摹倣某幅而爲之。則是臨畫。非作畫也。故凡學漢魏詩。必果如出漢魏人手。至欲指似某篇。無跡可求。斯爲盡變。此非專習凝領。而神與境會。弗能及也。于鱗十餘篇。庶幾近之。

古之於律。猶篆之於楷也。古有篆無楷。故其法自古。後人既習於楷。而轉爲篆。故其法始敝。漢魏有古無律。故其格自高。後人既習於律。而轉爲古。故其格遂降。學者但須專習凝領。庶幾克復耳。或言學古不必盡似。此殊爲學古累。果爾則自由機軸可也。學古豈容不類耶。與總論胡

元瑞云一則及今人作詩一則參看

漢魏晉宋之詩體語各別。今或以漢魏之體而用晉宋間語。雕刻語摘見晉宋論中是猶以虎豹之質蒙犬羊之皮。人見其爲犬羊。不見其爲虎豹也。

古詩賦惟三百篇楚騷未有定韻可考。漢魏兩晉則自有古韻。東冬江爲一韻。支微齊佳灰爲一韻。魚虞爲一韻。真文爲一韻。寒刪先與元前半截爲一韻。蕭肴豪爲一韻。歌麻爲一韻。庚青蒸爲一韻。仄韻倣此。如平聲東冬聲則董腫講爲一韻。去聲則送宋絳爲一韻。入聲則屋沃覺爲一韻。他韻當以類推。至劉宋始漸入今韻。今刻韻書謂江韻古通陽。真韻古通庚。青蒸侵刪韻古通覃。咸先先韻古通鹽。庚韻可轉爲陽韻。愚按

古詩以漢魏爲主。若出於漢魏之上。則吾不得而知。且江韻通陽。僅見古樂府長歌行。用一幢字。庾信代人傷往。用一雙字。庚韻轉爲陽韻。僅見曹丕雜詩。用一橫字。疑當時以鄉音叶入。何得據此便可通用。若諸家變體。又不可爲法。且謂真韻古通庚青蒸侵刪韻古通覃咸先。先韻古通鹽。予實無所考。果爾則凡口吻之便者。皆可通用。不幾於小兒學語耶。又各韻後刻古叶韻。益非詳論。周然學古詩用古韻。五言爲當。而七言未宜。蓋五言盛於漢魏。七言盛於唐也。若五言古唐體。則又不當用古韻矣。楊用修云。近世有偏強好異者。旣不用古韻。

又不屑用今韻惟取口吻之便鄉音之叶而著之詩良爲後人一笑資爾予謂後人學古詩不用韻者直是疎淺以爲古詩本不拘韻非偏強好異也

擬古與學古不同**擬古**如摹帖臨畫正欲筆筆相類朱子謂意思語脉皆要似他的只換却字蓋本以爲入門之階初未可爲專業也曾蒼山云前人**擬古**旣用其意又用其事是士之盜也斯言謬矣至于鱗元美於**古詩樂府篇篇擬之**則詩之真趣殆盡

以下三則論擬古之詩

擬古皆逐句摹倣則**情興窘縛神韻未揚**故陸士衡擬行行重行行等皆不得其妙如今人摹古帖是也惟江文

通雜體擬其大畧。不做形似。則清興駘蕩神韻自超。故倣魏文子建仲宣士衡等。有酷相類者。如今人學義獻。是也。至若士衡明遠樂府諸篇。雖借古題。而實自成體。則又非擬古類也。

擬古惟古詩及樂府五言爲難。而鐃歌及樂府雜言爲易。蓋古詩及樂府五言體有常法。而意未可移。故擬者不能自如。而其情易疎。鐃歌及樂府雜言體無常法。而意可寬易。故擬者得以操縱。而其調易古。胡元瑞云。郊廟鐃歌似難擬而實易。猶畫家之於佛道鬼神也。古詩樂府似易擬而實難。猶畫家之於狗馬人物也。可謂善喻。

試觀于鱗元美所擬當自得之。

漢初樂府四言如四皓采芝操高帝

諱邦字季

鴻鵠歌軼蕩自

如自是樂府之體不當於風雅求之三曹樂府四言皆

出於此然采芝不知何人所作疑樂府所為

以下分論漢人詩歌

高帝大風歌項籍

羽字

垓下歌皆樂府楚聲也

漢書漢武立樂府司馬遷

作史記蓋亦其時

大風詞旨雖直而氣蘊遠勝垓下詞旨甚婉

而氣稍不及元美謂各自描寫帝王興衰氣象是也

謂帝

王興衰氣象於此而見非真有意描寫之也

然二君皆非文士而大風已歌

於沛疑臣下潤色垓下則樂府潤色耳觀此其他可知

胡元瑞謂敕勒歌等原非出于文士果爾虞美人歌懔
偶見一二可也若篇篇成文則無是理矣

慨足悲而語近附合。疑出於僞。元瑞亦嘗言之。

樂府之詩。當以漢人爲首。馮汝言云。琴操肇於上古。如神

人暢。南風歌之類。又在仲尼前。但今所傳之曲。未必盡

出於古耳。樂府之名。自興於漢。何得以此相掩。已上皆汝言語

晚唐宋元諸人論詩。多失之不及。而國朝諸公論詩。每

失之過。如漢五言十九首。蘇李等作。晚唐宋元諸人畧

不及之。而雜言房中郊祀等作。國朝徐昌穀諸公。則

盛推焉。此過與不及也。(安世房中武帝郊祀雖出於頌)

然語旣深酷。前人謂多難曉。而義實卑淺。魏文汲黯亦

嘗病之。宋書樂志魏文帝讀安世詩無二南風化之言改曰享神歌史記時新得神馬因次爲歌汲黯

進曰凡王者作樂上以承祖宗下以化兆民今陛下得馬詩以爲歌協於宗廟先帝百姓豈能知其音耶今按寶鼎芝房白麟赤鴈等歌皆此類也且其體多變而句甚雜王元美云郊之太峻非頌詩比也唐山夫人雅歌之流調短弱未舒耳馮元成亦云房中歌雅歌之流類嶧山諸銘綽時日三言之始詞騁而意放騷之變而雅之反也是其體多變也又三百篇以四言爲主三言雜言間有之耳房中郊祀或通章三言又有變至七言者是其句甚雜也元成言騷之變而雅之反當言騷之變而頌之反爲是以頌準之去頌實遠下流至王仲宣太廟頌俞兒舞今不辨其純雜察其正變但以其深酷奇峻而獨推之是慕好古之名而不得其實者也然房中去頌雖遠恐亦非唐山夫人作或以爲秦宮中內史高帝收錄之是也安世房中去頌雖遠而語實深奧非尋常文士所及元美所謂調短弱者特以雅歌相况言之非婦人才短氣弱之謂也

周之雅頌多周公之徒所製。故其體爲正。而其句有則語
既顯明。而義實廣大。漢之房中郊祀。乃相如之徒所爲。
武帝郊祀十九章使司馬相如鄒子樂等爲之。故其體多變。而句甚雜。語既深
酷。而義實卑淺。王叔武云。雅頌不見於世久矣。雖有作
者微矣。語甚有見。

郊祀三言。如練時日。天馬徠華燁燁。赤蛟綏等篇。氣甚遒
邁。語甚軼蕩。爲三言絕唱。然自是漢人樂府。若以頌體
求之。則失之遠矣。

韋孟四言。

諷諫

韋玄成

字少翁

四言

自効等

詩

其體全

出大

雅

然大雅雖布置聯絡。實不必首尾道盡。故從容自如。

而義實寬廣。韋孟玄成先後布置事事不遺。則矜持

太甚。而義亦窘迫矣。

下流至曹子建王仲宣四言

孟諷諫十一章。在

鄒六章。玄成自刻十章。戒子孫七章。章數甚明。諸家皆不能分。後人四言因遂有不分章者。

徐昌穀云。韋孟輩四言窘縛不蕩。曹公短歌行。子建來日

大難。

來日大難宋書樂志作古詞

工堪爲則矣。白狼槃木詩三章。亦

佳。緣不受雅。

頌

困耳。愚按元美謂韋孟玄成雅頌之後。

不失前規。元瑞謂曹公子建二詩。雖精工華爽。而風雅

典刑幾盡。

二詩本樂府體說見於後

斯並得之。若韋孟玄成之窘縛

者。直是先後布置事事不遺故耳。非受雅頌困也。

古詩五言十九首。舊註詩以古名。不知作者爲誰。或云枚

乘。而梁昭明旣以編諸蘇李之上。李善謂其詞兼東都。

中有上東門宛洛等語。非盡爲乘詩。故蒼山曾原演義特列之。張

衡四愁之下。蓋十九首本非一人之詞。今姑依昭明編

次云。

已上古詩註今文選編次又不同矣。

按鍾嶸云。古詩去者日以疎。四

十五首云云。則十九首與上山采蘼蕪等篇皆古詩也。

昭明刪錄而爲十九首耳。然中旣有枚乘之詩。則當爲

五言之始。

古詩十九首。鍾嶸謂其體源出於國風。劉勰謂宛轉附物。

怆悵切情是也。王元美云。十九首談理不如三百篇而

微詞婉旨。遂足並駕。是千古五言之祖。予竊更之云。十
九首性情不如國風。而委婉近之。是千古五言之祖。蓋
十九首本出於國風。但性情未必皆正。如何不策高足
先據要路津無
為守窮賤轍軻長苦辛燕趙多佳人美者顏如
玉思為雙飛燕銜泥巢君屋其性情實未為正而意亦
時露。又不得以微婉稱之。然於五言則實為祖先正謂
興寄深微。五言不如四言是也。

興寄深微。五言不如四言。以漢魏較國風也。若潘陸四言
聯比牽合。蕩然無情。十九首託物興寄。情致宛然。又不
當以此論耳。王敬美云。十九首五言之詩經也。潘陸而
後。顏延年
謝玄暉四言之排律也。深得之矣。

漢人五言。惟十九首觸物興懷。未嘗先立題而爲之。故興象玲瓏。無端倪可執。此外因題命詞。則漸有形跡可求矣。魏曹王諸子雜詩亦然。

古詩十九首。乃昭明選錄。采衆人之精。故文采完美。畧無蒼莽之態。或以此見琢磨之功者。非也。

古詩十九首而外。惟新樹蘭惠葩。步出城東門。二首可與並駕上山采薜蘿。四座且莫喧。十五從軍征。三首類樂府體。餘則未能完美耳。又楊用修集所載。閨中有一婦一篇。淺近不類。未敢收錄。青袍似春草。長條隨風舒。疑亦非漢人語。

十九首固皆本乎情興而出於天成。其外如上山采蘼蕪等。雖有優劣。要亦非用意爲之也。胡元瑞云。十九首及諸雜詩。隨語成韻。隨韻成趣。詞藻氣骨。畧無可尋。而興象玲瓏。意致深婉。元美乃云。十九首人謂無句法。非也。極自有法。無階級可尋耳。又云。東風搖百草。稍露崢嶸。便是句法。爲人所窺。豈以漢人亦有意斂藏耶。善乎趙凡夫云。古詩在篇不在句。後人取其句字爲法。謂之步武可耳。何嘗先自有法。

漢人古詩。本未可以句摘。但魏晉以下。既有摘句。而漢人無摘。不足以較盛衰。今姑摘起結數十語。以見大畧。起

語如行行重行行。與君生別離。相去萬餘里。各在天一
涯。青青河畔草。鬱鬱園中柳。盈盈樓上女。皎皎當窗
牖。涉江采芙蓉。蘭澤多芳草。采之欲遺誰。所思在遠
道。冉冉孤生竹。結根泰山阿。與君爲新婚。兔絲附女
蘿。東城高且長。逶迤自相屬。迴風動地起。秋草萋以
綠。驅車上東門。遙望郭北墓。白楊何蕭蕭。松柏夾廣
路。結語如思君。令人老。歲月忽已晚。棄捐勿復道。努
力加餐飯。不惜歌者苦。但傷知音稀。願爲雙鴻鵠。奮
翅起高飛。傷彼蕙蘭花。含英揚光輝。過時而不采。將
隨秋草萎。君亮執高節。賤妾亦何爲。人生非金石。豈

能長壽考。奄忽隨物化。榮名以爲寶。馳情整巾帶。沉吟聊躑躅。思爲雙飛燕。銜泥巢君屋。服食求神仙。多爲藥所誤。不如飲美酒。被服純與素。等句。不但語出天成。而興象玲瓏。意致深婉。亦可槩見熟詠全篇。則建安以還。高下自別矣。

古詩五言四句如采葵莫傷根南山一樹桂二篇格甚高

古語甚渾樸有天成之妙此五言絕之始也下流至曹子建五言

四句日暮秋雲陰乃六朝人詩菟絲從長風則六朝樂府

語耳

武帝

諱微之字曰通

楚辭瓠子二歌質勝於文氣格蒼古秋風辭

文質得宜。格在其中。王元美云。漢武固是詞人。秋風一

章。幾於九歌矣。胡元瑞云。大風。千秋氣槩之祖。秋風。自

代情致之宗。

已上元瑞語

樂府雜言。李夫人歌。僅十數言。而

委婉有致。意味無窮。楚聲落葉哀蟬曲。聲調極靡。而題亦非古。出於王子年拾遺。僞撰無疑。仲默擬之。不能辨

七言歌謠。其來雖遠。而真僞莫辨。詩則始於漢武帝。栢梁

臺聯句。栢梁詩羣臣各以其職詠一句。殊不成章。且其

語太質野。未可爲法。胡元瑞云。栢梁句調太質。興寄無

存。不足貴也。

已上元瑞語

然平子四愁子。栢燕歌。晉人白紵

每句用韻。實本於此。又不可缺。後人因謂每句用韻者

爲栢梁體因并錄之

屈宋楚辭本千古辭賦之宗而漢人摹倣盜襲不勝饜飫
惟小山招隱士一篇聲既峻絕而語復奇警在屈宋後
矯矯獨勝胡元瑞云求騷於漢之世其招隱乎較之秋
風招隱奇秋風正太白多類招隱子美常近秋風

淮南王招懷天下之士故小山作招隱士以招之大意言
山林險阻虎豹叫噪不可以處與後人招隱之意相反
王逸謂小山傷閔屈原雖身沉沒名德顯聞與隱處山
澤無異故作招隱士以章其志可爲絕倒

卓文君樂府五言白頭吟沛然從肺腑中流出其晉樂所

奏一簡。乃後人添設字句。以配音節耳。樂府滿歌行。西門行。東門行。及甄后塘上行。皆然。昔人稱李延年善於增損古詞。則樂府於古詞。信有增損者。

李陵

字少卿

蘇武

字子卿

五言

昭明

選錄

諸文

選劉勰

乃云

成

帝品錄三百餘篇。而詞人遺翰莫見。五言所以李陵班

婕妤見疑於後代也。愚按左氏傳子長不及見。

左傳漢初出於

張蒼家文帝時賈誼爲訓詁授趙人貫公未行於世至建武時陳元最明左傳上書訟之乃以魏郡李封爲左氏博士封卒復罷其後賈逵服虔皆爲訓解至魏遂行於世漢書所載而史記有弗

詳者。正以當時書籍未盡出故耳。由是言之。成帝品錄而不及蘇李。又何疑焉。東坡嘗謂蘇李之天成是矣。至

因劉子玄辯李陵書。非西漢文。乃謂蘇李五言亦後人所擬。亦不免爲惑。蘇李七篇。雖稍遜十九首。然結撰天
成。了無作用之跡。決非後人所能。若文苑所載錄別數
首。則後人因七篇而廣之者。元美謂雖總雜寡緒。而渾
樸可詠。固不必二君手筆。要亦非晉人所能辦也。又摯
虞云。晉初人李陵衆作。總雜不類。殆是假託。非盡陵志。至
其善篇。有足悲者。總雜不類。蓋指錄別善篇足悲。乃謂
文選所錄耳。以此觀之。其來遠矣。然勰之言。亦有所據。
初非謬妄。

馮元成云。少卿怨而不怒。子卿哀而不傷。愚按少卿三篇

慷慨悲懷。自是羈臣口吻。子卿四首。雖稍爲散緩。而頓挫抑揚。亦是西京風範。然摯虞論李陵。而不及蘇武。劉勰鍾嶸。與昭明同時。而亦不及武者。蓋亦有未見耳。少卿如屏營衢路側。執手野踟躕。風波一失所。各在天一隅。臨河濯長纓。念子悵悠悠。行人懷往路。何以慰我愁。行人難久留。各言長相思。等句。皆羈臣口吻也。子卿如况我連枝樹。與子同一身。昔爲鴛鴦。今爲參與辰。征夫懷往路。起視夜何其。參辰皆已沒。去去從此辭。請爲遊子吟。泠泠一何悲。欲展清商曲。念子不能歸。等句。皆頓挫抑揚者也。

鍾嶸云。李陵始著五言之目。皎然云。李陵。蘇武。天與其性。發言自高。未有作用。十九首辭精義炳。婉而成章。始見作用之功。作用之功。卽所謂完美也。見班固論中下卷。言作用之跡。正與功字不同。功則猶爲自然。跡則有形。可求矣。信如此說。則五言不始於十九首矣。

宋人謂蘇李詩。在長安而言江漢。又謂獨有盈觴酒與十九首。盈盈一水間。俱不避惠帝諱。疑皆非漢人詩。愚按子卿第四首。乃別友詩。安知其時不在江漢。又韋孟諷諫詩。總齊羣邦。於高帝諱且不避。何必惠帝。趙凡夫云。說文止諱東漢秀。莊。烜。祐。四字。而於西漢邦盈以下。皆不諱也。

漢稱蘇李。李豈讓蘇。魏稱嵇阮。嵇寧勝阮。以至晉之潘陸。宋之顏謝。陳之徐庾。唐之高岑。錢劉元白。皆順聲而呼。非以先後爲優劣也。

昭帝

諱弗陵
字曰玉

黃鵠淋池。二歌皆樂府楚聲也。黃鵠氣格蒼

古。聲韻峻絕。淋池情雖蕩而氣則淳。然淋池出於王子
年拾遺真僞亦不可知。

王嬀四言

怨詩。蓋樂府體也。制作雖工。而敘述太周。用意

太切。出於僞撰無疑。

班婕妤樂府五言怨歌行。託物興寄。而文采自彰。馮元成
謂怨而不怒。風人之遺。王元美謂可與十九首蘇李並

驅是也。成帝品錄詞人，不應遂及後宮，不必致疑。

其說見蘇

李論

趙飛燕樂府楚聲，有歸風送遠操，語甚淺易，而題亦非古。

亦僞撰也。

馬援

字文淵

樂府雜言，武溪深行，僅二十餘言，情景相融，鬱

紆有致，是樂府妙境。

傅毅

字武仲

四言廸志詩，二章之後，實可繼響，當作八章。

班固

字孟堅

四言明堂辟雍、靈臺諸詩，非雅非頌，其體爲變

五言詠史一篇，則過於質直。鍾嶸云：班固詠史，質木無

文是也。

予嘗謂漢魏五言由天成以變至作用故編次先十九首
次蘇李班婕妤次魏人然劉勰云成帝品錄三百餘篇
而詞人遺翰莫見五言所以李陵班婕妤見疑於後代
也又或疑十九首多建安中曹王所製其說亦似有見
班固詠史質木無文當爲五言之始蓋先質木後完美
其造詣與唐人相類漢先西京論四言雜言也晉以後
五言則文益勝矣

張衡

字平

四言怨篇得風人之致然僅止一章恐非全詩

樂府五言同聲歌較之西京始見作用之跡

張衡

樂府七言

四愁詩

兼本風騷

而其體渾淪

其語隱約

有天成之妙當爲七言之祖下流至曹子桓燕歌行胡元瑞云四

愁章法實本風人句法率由騷體又云離騷盛於楚漢

一變而爲樂府大風垓下等歌體雖不同詞實並駕乃變之善

者也愚按離騷變爲樂府而四愁則尤善云如我所思

今在泰山欲往從之梁父艱側身東望涕霑翰美人贈

我金錯刀何以報之英瓊瑤路遠莫致倚道遙何爲懷

憂心煩勞等章體皆渾淪語皆隱約者也此未可句摘故錄首章以

見大畧後燕歌行自紵舞歌行路難皆同蓋欲小論另成一書也

朱穆四言絕交詩語甚庸鄙不當以古質目之蓋漢人詩

雖人止數篇亦自有當家也

靈帝

諱宏

樂府楚聲有招商歌聲氣與昭帝淋池歌相類然

亦出於子年拾遺真偽亦不可知

高彪

字義方

五言清誠一篇蒼莽古質與曹孟德相類趙壹

字元叔

酈炎

字文勝

孔融

字文舉

秦嘉

字士會

五言俱漸見作用

之跡而壹炎融則用意尤切蓋其時已與建安相接矣

徐昌穀云孔融臨終詩大類銘箴語胡元瑞云趙壹疾

邪詩句格狠凡漢五言最下者俱得之矣

後漢書蔡琰

字文姬

歸後感傷亂離追懷悲憤作詩二章思

按五言一章與焦仲卿妻詩相類陳繹曾謂真情極切

自然成文是也但篇首十數語稍見鄙拙耳胡元瑞謂

猶褚先生學太史者。非其楚調一章。語雖猥凡。然自是

琰作。胡笳十八拍。出於僞撰無疑。王元美云。胡笳十八

拍。輒語似出閨襜。而中雜唐調。非文姬筆也。中如城頭

滅疆場。征戰何時歇。殺氣朝朝衝塞門。胡風夜夜吹邊

月。胡笳本自出胡中。援琴翻出音律同。數語乃唐調也。漢人樂府五言與古詩體各不同。古詩體既委婉而語復

悠圓。樂府體既軼蕩而語更真率。下流至曹子建樂府五言蓋樂府

多是敘事之詩。不如此。不足以盡傾倒。且軼蕩宜於節

奏。而真率又易曉也。趙凡夫謂凡名樂府皆作者一一

自配音節。予未敢信。樂府如長歌。變歌。傷歌。怨詩等。與

古詩初無少異。故知漢人樂府已不必盡被管絃。况魏

晉以下乎。若云采詞以度曲。則十九首蘇李等篇。皆可入樂府矣。元微之樂府古題序。亦未盡得。

漢人樂府五言。軼蕩宜於節奏。樂之大體也。如白頭吟。塘上行等。後人添設字句。以配音節。樂之律調也。其他亦必有添設字句者。但不盡傳耳。初非作者自配音節也。若雜言諸作。則又不可繁論。

漢人樂府五言。有歌。行。篇。引。等目。名雖不同。而體則無甚分別。後人必欲於樂府諸名辯之。恐不免穿鑿耳。今試舉樂府數篇而隱其名。有能別其爲歌。爲行。爲篇。爲引者。則予爲無識矣。茂秦元瑞亦嘗言之。

漢人樂府五言如相逢行羽林郎陌上桑等古色內含而

華藻外見可爲絕唱如相逢行云黃金爲君門白玉爲

君堂堂上置樽酒作使邯鄲娟中庭生桂樹華燈何煌

煌黃金絡馬頭觀者盈道傍入門時左顧但見雙鴛

鴛鴦七十二羅列自成行羽林郎云胡姬年十五

春日獨當壚長裾連理帶廣袖合歡襦不意金吾子

娉婷過我廬銀鞍何煜爚翠蓋空踟躕就我求清酒絲

繩提玉壺就我求珍肴金盤鱸鯉魚陌上桑云羅敷

喜蠶桑采桑城南隅青絲爲籠係桂枝爲籠鉤頭上倭

墮髻耳中明月珠綃綺爲下裙紫綺爲上襦東方千

餘騎。夫壻居上頭。何用識夫壻。白馬從驪駒。青絲繫馬尾。黃金絡馬頭。腰中鹿盧劍。可直千萬餘。等句皆古色。內含華藻。外見者也。晉宋而下。文勝質衰。綺靡不足觀矣。

漢人樂府五言。焦仲卿妻詩。真率自然。而麗藻間發。與陌上桑竝勝。人未易曉。何仲默云。古今惟此一篇。凡歌辭簡則古。此篇愈繁愈古。王元美云。孔雀東南飛。質而不俚。亂而能整。敘事如畫。敘情若訴。長篇之聖也。已上六句元美語然命如南山石二句。上下或有脫簡。

漢人樂府雜言有饒歌十八曲。中多警絕之語。但全篇多

難解。及迫詰屈曲者。或謂有缺文斷簡。或謂曲調之遺聲。或謂兼正辭填調。大小混錄。其意義明了。僅十二三耳。于鱗元美篇篇擬之。豈獨有神解耶。中惟上陵君馬黃有所思。上邪臨高臺五篇稍可讀。姑錄之。如山出黃雀亦有羅。雀以高飛奈雀何。水深激激蒲葦冥冥。梟騎戰鬪死。驚馬徘徊鳴。湯湯回回。臨水遠望。泣下沾衣。桂樹爲君船。青絲爲君竿。木蘭爲君櫂。黃金錯其間。芝爲車。龍爲馬。覽遨遊。四海外。美人歸以南。駕車馳馬。美人傷我心。佳人歸以北。駕車馳馬。佳人安終極。君有他心。樂不可禁。有所思。乃在大海南。何用

問遺君。雙珠玳瑁簪。聖人出。陰陽和。美人出。遊九河。
袁山無陵。江水爲竭。冬雷震震。夏雨雪。天地合。乃敢
與君絕。臨高臺以軒。下有清水清且寒。江有香草目
以蘭。黃鵠高飛離哉翻。等句。皆爲警絕者也。于鱗雖
多相肖。而不免於襲。元美則別一調矣。

漢人樂府雜言。如古歌。悲歌。滿歌。西門行。東門行。豔歌。何
嘗行。文從字順。軼蕩自如。最爲可法。烏生。王子喬。董逃
行。孤兒行。婦病行。語雖奇古。中有不可解。不可讀者。然
滿歌而下實爲孟德子桓雜言之祖學者苟能一一強
記。則識見高遠。下筆蒼古。而於後人擬古等作。可別其

遠近矣。中如王子喬去。王子喬參駕白鹿上至雲。戲遊邀。東遊四海五嶽。上過蓬萊紫雲臺。二王五帝不足令。令我聖朝應太平。董逃行云。但見芝草葉落紛紛。教敕凡吏受言。采取神藥若木端。王兔長跪擣藥蝦蟇丸。奉上陛下。下一玉梓。陛下長生老壽。四面肅肅稽首。天神擁護左右。陛下長與天相保守。孤兒行云。父母在時。乘堅車。駕駟馬。父母已去。兄嫂令我行賈。南到九江。東到齊。與魯臘月來歸。不敢自言苦。淚下漉漉。清涕壘壘。冬無複襦。夏無單衣。等句。亦可爲警絕者矣。

漢人樂府雜言如董逃行。鴈門太守行。詞意與題全不相類。疑別有古詞。此但習其聲調耳。曹孟德。陌上桑。秋胡行。亦然。